

Problemanan di Demokrasia

Demokrasia tin su problemanan. E por laga hopi di deseá. Hopi biaha ta durante e periodo di tempu promé i despues di elekshon ku e problemanan di demokrasia ta resaltá.

Promé ku elekshon, por tin “kumpramentu di voto”. E partido ta hasi fabornan (talbes finansiero) pa hende—òf ta primintí sierto fabor si nan wòrdu eligí—ku e antisipashon ku e persona lo vota pa e partido. Esei ta problemátiko! Ademas, maske tantu hende ta kondená esei, tòg nan ta bai tras di e fabornan i promesanan!

Promesanan irealistiko di partidonan ta un problema. Nan ta primintí pa drecha kos den nos komunidad, kasi dunando impreshon ku kuater aña di nan gobernashon lo produsí un paraiso unda tur hende lo ta felis!

Ta problemátiko ku tantu hende ta vota pa nan pòtmòni. Nan ta akusá polítikonan ku nan no tin interes di nos isla na pechu, ku nan ta interesá solamente den prosperidat personal. Ma e mésun hendenan ta sera wowo pa ku bienestar di e isla ora nan ta vota. Nan ta wak ta ken lo pone mas sèn den NAN saku.

Dianan di elekshon, hende promoviendo nan partidó ta hasi wega i ta tèr otro. Ma tin ora e weganan ta sali fo’i man i ta bira insidente mas serio. Mi tin problema ku esei!

Ta problema ku hopi biaha despues di elekshon, e partido viktorioso ta baha amtenar i trahadónan di gobièrno ku no ta nan koló. Na lugá di selektá e persona mihó kalifiká p’è trabou, koló ta e faktor determinante. Ta komprendibel ku mester kita empleadonan di mas, esnan inkonfiabel, trahadónan ku no ta hasi nan trabou optimal, i pone empleadonan mihó kalifiká. Ma ora koló ta e faktor determinante, esei ta problemátiko!

Ta problema ku demokrasia ta basá riba e konsepto ku deseo di mayoria ta e desishon korekto. **Tin bes, mayoria ta kiboká!** (Kòrda, mayoria a krusifiká Hesus!)

Ta problema ku si partido maron ke hasi algu, partido lila ta oponé maske kon bon e plan por ta. Di otro banda, partido maron tambe ta oponé desishonnan korekto di partido lila. Tur esei pa kosechá bentaha polítiko...

Si demokrasia ta tan problemátiko, nos mester buska un otro sistema di gobernashon? E filósofo griego, Aristotle, a presentá tres posibilidat pa gobernashon: (1) *monarkia*—governashon dor di ún persona, (2) *aristokrasia*—governashon dor di poko persona, i (3) *demokrasia*—governashon dor di hopi hende.

Frankamente bisá, mi ta haña ku e sistema di **governashon dor di ún persona ta e mihó sistema**. Un diktadó por imponé un desishon korekto i respekto si e ta popular. Un rei supremo por hasi loke ta benefisiá e pueblo sin tene kuenta ku partidonan polítiko. Ma—komprendé bon—pa un diktadura por ta e mihó forma di gobernashon, e **MESTER** ta un persona totalmente hustu, ku ta stima e pueblo ku e ta goberná. Ma nèt esei t’e problema! **Tur hende ta pekadó; ningun ta perfektamente hustu; ningun hende ta stima su pueblo sin interes propio.** Ningun ta kalifiká pa goberná su so, ku 1 eksepshon...

Den futuro, un Persona no-eligí lo reina riba mundu! E Rei lo ta asina hustu i bon, ku lo tin prosperidat i pas mundial pa durashon di Su reinado di mil aña. E ta e úniko ku ta kalifiká pa goberná Su so! E Persona aki ta Hesus! Beibel ta bisa, “*.ku hustisia E lo huzga e pobernan, i disidí ku onestidat...leopardo lo kai drumi banda di lamchi di kabritu...desierto lo...regosihá i floria manera rosa*” (Isaias 11:1-9; 35:1-10)

Ma mientras Hesus no ta reina supremo, apesar di tur su problemanan, nos lo sigui kokochá ku e **mihó sistema di gobernashon ku hende pekadó konosé...demokrasia**. I lo mi sigui enkurashá hende pa hasi uso di e privilegio pa bai urna i vota pa e mihó kandidato. Mi no tin problema ku esei!